

陝

縣

志


第 二 冊

民
政

族
姓

建
置

橋河澗




SWT437 / 16

歷年山濫
費咸夏斷
交
通創見
奇工建
長橋亘

卧缸

題洵河橋


新 生 活 俱 樂 部



禮堂新建設生活舊文
四月多士來聽訓徽猷自此
行


題俱樂部

重達橋



建橋傳筆迹偉構在
張茅往哲多題咏今編
手自抄
合印題

樓卦八鎮興會



技匠傳般巧工成八卦樓
陽方位協構造門心鈎

層真鑑八卦樓

正傳宮於開封

陝縣志卷四

歐陽珍編次

建置

陝縣歷屬大郡建置多方代有興廢茲據舊志臚敘其沿革近代更採擇加詳凡以明其變遷進化之迹而新政改良一日千里有非普通思想所能料及昔人謂小民可與樂成難與圖始詎不信歟

城池

陝城爲西漢所築周圍十三里一百二十步東南有濠深五丈西北近黃河高十餘丈代有修濬明洪武初置瑞王府千戶劉全截去東城三分之一屬宏農衛守之周圍九里一百三十步高三丈八尺廣三丈二尺池深二丈五尺闊如之門四東曰宣威南曰迎恩西曰政平北曰宣化宏治十年知州汪濬指揮呂璽重修城門各有樓崇禎八年毀於寇清康熙十八年知州羅錦增修雍正七年署知州黃起盛修葺乾隆二十七年知州姜本源修葺嘉慶二十年九月地震坍塌報明修整至南門石坡爲同治六年知州周仁壽修葺光緒八年十五年石坡先後爲澗水冲壞經知州趙希曾籌款修復十六年夏大雨澗水

復漲石坡崖基全行刷沒水迫城根門外成懸崖絕壁趙希曾回任由州稟道籌款興築分作十三年攤捐彌補攔河大隄東西長五十六丈底寬六丈頂寬四丈七尺並築城門坡道南北長十二丈底寬五丈一尺面寬四丈北靠城門高三丈二尺南靠大隄高一丈接連拐坡一道東西長七丈底寬三丈二尺面寬二丈八尺東高一丈與隄平西與地平便門外坡道東西長九丈底寬二丈面寬一丈二尺北靠城根南靠城濠共用工料銀六千八百兩有奇籌款不敷銀三百九兩知州孔廣聰捐俸補足民國二十二年秋歐陽專員改修南城門樓爲民衆茶園二十四年澗河橋成墊南門坡道與橋平二十五年春濬修城池四圍並城上衛牆又於正東東北東南三方建築土礮各一座民利賴之

公署

專員公署卽縣署 縣署卽前州署在城西北隅後魏建隋後廢置不一元末毀於兵明初知州聞人桂因舊址剏建崇禎八年寇毀知州陳道蘊重建越五年再毀清順治七年知州劉世傑復建廳事三楹東西各二楹爲庫藏後廳三楹上房五楹戒石坊儀門東西角門左土地祠右獄大門東爲寅賓館西南爲倉東爲馬廐道光十八年知州張汝誠詳修光緒五年知州嚴作霖重修二堂等處民國二年改州爲縣稱縣署十七年改大堂爲

大禮堂置豫西第三行政區署旋罷嗣改縣署爲縣政府二十一年置河南第十一區行政督察專員公署二十二年八月歐陽專員蒞任積極籌款修理公署全部保安司令部遷入之新建東西兩辦公廳及管卷儲藏室後園建公共浴室西邊膳槎園改爲勵志社大門外西首監獄復加修築改良東首又建田賦經徵處公署始具嚴整偉大之觀焉前分巡河陝汝道公署現師範學校 在縣治東舊治在汝州清雍正十三年河東總督王題請添設巡查道駐劄陝州是年就察院舊址建署左右轅門鼓棚大門儀門廳事三楹內廨共七十四楹箭廳一座馬王廟一座大門外官廳一座道光二十七年巡道施捐廉重修知州丁作霖督修光緒二年巡道尹修九年知州趙希曾修十年巡道耆續修十八年巡道沈守濂增修民國二年改爲河洛道尹公署移洛陽民國六年置豫西鎮守使署於此縣紳蘇容衆牛國棟籌款大事修葺十二年鎮署廢十六年設立師範學校以東首憩園舊址改爲縣黨部

前督學行署現陝縣中學 在城內東街陝州舊隸河南府生童歲科赴郡應試雍正二年改直隸州十一年生童捐資建署具呈學院題請蒞陝按試乾隆元年四月初十日奉部覆准照光鄭二州例學臣歲科按試同治二年知州周仁壽大修學政何金壽爲文記

之載金石光緒九年知州趙希曾修葺清末科舉廢縣紳張坤建議改爲陝州中學堂民國初改爲省立第九中學校後又改爲陝縣初級中學校以左首李公祠附入焉

前陝州營都司署現福音堂 在師範學校東爲舊學正廨清雍正三年拓爲都司署大門儀門廳事三間箭廳三楹乾隆十二年都司邱民樂增修民國初地方變官產都司署賣於楊姓復又轉售於外國人改築爲福音堂

明倫堂 在學宮後

學正廨 在明倫堂東

訓導廨 在明倫堂西民國初二廨及明倫堂俱改爲教育局二十四年劃歸農林實驗學校

譙樓 在縣治前迤東現設警察一隊置警鐘焉

按舊志載州治中有元時貢院東有察院行臺譙樓左有布政司行臺及陰陽醫學前有中軍千總迤東有州判廨迤南有吏目廨驛右有按察司行臺儒學西有府館二州署門西有申明亭東西有榜房州治南有稅課司廨督學行署後有養濟院左有廣濟堂柴市巷有育嬰堂南門外有演武場置講武廳三間有臺基高五尺今並廢

公共體育場 民國二十三年春專員歐陽珍修建就城內城隍廟舊址平治坑坎并將原有縣公共體育場合併爲一大加擴張規模偉大東西一百五十公尺南北一百十公尺徵用民夫及保安隊士兵平土去礫利用舊磚建築四週看臺北首中間新建司令臺一座西首建大門出北大街大門北邊建築房屋十餘間爲體育場及國術館人員住所現警察第一分駐所亦住其中西北大坑用土填平大半場內設置各種運動器具自二十三年起每年開區運動會一次平時召開大會及士兵學生操練運動多在場內行之新生活俱樂部 在城內北大街路西民國二十四年秋專員歐陽珍建翌年元旦行落成典禮籌用捐款壹萬餘元圖爲西洋式規模宏大四圍牆壁以磚砌成嵌以玻璃窗置小門四天棚則以鋼筋水泥打成一片後置講臺供講演及游藝其下能容聽衆千人大門以上建洋樓三層凡有集會及尊客宴享住宿皆假之並以新生活運動促進會遷入焉樓頂平曠直看城圍數十里外街巷屋瓦櫛比俱歸眼底陝人睹此偉大之建築無不慶幸稱爲新奇新生活日進不已陝民與有同樂者焉

女子學校 在俱樂部之北二十四年十月專員歐陽珍以前中軍千總廨廢址從新建築之計南北教室十四間大門樓五排與房五間大禮堂三間左右廂房六間寢室十間

廚房四間小房二間廁所二間共四十六間籌用捐款九千四百五十圓女校始有永久地址

河南第十一行政督察區師資訓練所 在女校之北民國二十五年春專員歐陽珍建計教室四所房舍四十四間並廚房廁所等籌用捐款壹萬餘圓

陝縣第一區區署 在城東街路北民國二十三年區長張世傑劃城隍廟東首之一部從新建築

警察所 第一分駐所設公共體育場內第二分駐所在南關北大街路東民國二十三年專員歐陽珍籌款新建

縣立醫院 在陝城東南偶寶輪寺內民國二十三年專員歐陽珍創設置院長一人護士數人內外均用西藥西法療治之

救濟院 在城內黃土坡巷東首娘娘廟內民國十七年六月成立原就破廟舊址專員歐陽珍復創建孤兒所三間并修葺破爛房舍院長張克功現從事添設工藝所除原有織襪織裹腿等工藝外加以製粉筆編毛衣織毛巾等輕手工業按災民年齡分配授以自立技能焉

貧民工廠 在城東南隅火神廟內民國二十年三月創立以罰款二千元作基金由抗日經濟絕交委員會移交機器一部擬價四百八十元作固定金經常費每月三百元置廠長一人技師二人事務員二人工徒三十名二十二年奉建設廳令改名民生工廠以張鶴爲廠長二十四年六月改官立爲商辦經常費取消

按龔志陝州養濟院額設孤貧九九名每名日給口糧銀一分歲給冬月花布銀三錢三分六厘五毫五絲由丁地內扣除廣濟堂收養貧民無定額清雍正十二年知州程世綏勸紳民捐建共瓦房三十七間除置備器具外餘贍銀六百八十六兩雍正十三年知州羅儀建築育嬰堂捐銀二百二兩五錢除建蓋瓦房九間門樓一座及置備器具等物外餘贍銀一百二十兩時因堂內並無收養與廣濟堂餘贍銀歸併二項共銀八百六兩交鹽當商按月二分生息又有地基租錢九千文共爲廣濟堂內貧民口糧之資初設堂時每名每月給米二斗鹽菜錢一百文貧民如有病故者每名給棺木銀二兩乾隆十年五月內奉文廣濟堂息銀不敷嗣後堂內貧民應照養濟院之例每名每日給口糧銀一分棺木銀兩按照折中七錢爲率不得浮多至知州趙希曾修志時貧民有七十二名在廣濟渠等稞租項下按名支給口糧事相隔百餘年不知前項銀

兩歸於何所又乾隆七年十月奉巡道張劄開呂叔簡先生政書中收養病旅教習瞽童諸事堪可效法今捐銀五十兩劄諭到州知州陳錫輅隨揀選磁鐘鎮善良貢生賈文煜張茅鎮善良民人丁福臨硤石鎮善良民人賈質等董理病旅寓事病旅扶病而來醫痊而去所費藥資飯食按季分發又設瞽目堂於城隍廟東延請瞽師一名每月給工銀二兩撰成勸善良言數十篇令瞽師在堂教習瞽童歌詞兼授星卜知州陳復籌經久之計隨捐銀一百兩靈寶縣知縣鍾獅捐銀四十兩閬鄉縣知縣祖廷梁捐四十兩共銀二百三十兩除每年以養病旅瞽目外餘銀二百兩交當舖二分生息爲病旅瞽童永久瞻養之資至趙志病旅寓瞽目堂俱廢矣專員歐陽珍蒞陝致力建設百廢並舉因述現在種種偉大建置事姑將過去陳蹟存而錄之以見政之興廢端在乎人俾來者有所比觀焉

倉庫

常平倉 在州署前清康熙三十一年三月知州甘國璧建共四座十二間
新建倉四十五間共九座在州城東南隅清康熙四十四年知州周全功建
新北倉六十間共十四座在州署西清雍正七年五月知州王榮賜建